

---

## AIMERI DE SARLAT.

---

### I.

QUAN si cargo 'l ram de vert fueilh,  
E l'auzelet uns, dui e trei  
Penson d'amor e de dompnei,  
E contra 'l rai si fan garueilh,  
Comens mon chan ab lo temps de doussor,  
E quar m'agr' ops q'ab la novella flor  
Uns novells jois mi dones jauzimen,  
Qu'estat ai sol ses amor lonjamen.

Ar for' el sobeiran escueilh  
D'amor, s'auzes clamar mercei,  
E portera senhal de rei,  
E fora plus ges que no sueilh,  
E penr' yvern per bel temps de pascor,  
E freida neu per estiu ab calor,  
E prometre per donar mantenen,  
E lonc esper per atendre breumen.

Tart er qu'ieu per leis mi despueilh,  
Ni la tenha, ni la manei,  
Quar tan tem son ric senhorei  
Qu'ieu cug dir foudat et ergueilh;  
E m sui cubertz de ma granda tristor,  
E trac l'afan de las penas d'amor,

E vauc ves tal franc et obedien  
Qui ja per mi non sabra mon talen.

Obs m'agra parlesson miei hueilh,  
Qu'en nul autr'amic no m'en crei,  
Quar m'an mes en tan gran esfrei  
Que disseson so don mi dueilh  
A leis cui tenc per dona e per senhor,  
Que m dones joi e m leuges ma dolor,  
Qu'ieu trac l'afan de l'amador sufren  
Que seila 'ls mals, e 'ls bes gieta prezen.

Dona, qu'es en l'aussor capdueilh  
Sobre totas cellas c'om vei,  
Merce us clam que l'aiatz de mei,  
Que vàs nuill outra no m destueilh;  
Que merce deu hom trobar ab valor,  
Et amors deu chاوزir fin amador;  
E s'ieu ab vos non truep d'amor guiren,  
Amors e pretz son nom ves mi desmen.

Dona de pretz, senhoressa d'amor,  
Fina beutat ab natural color,  
Pos en vos es tot aisso ab joven,  
Esser i deu merces ab chاوزimen.

Chansos, vai t'en tan com poiras, e cor  
Dreg a 'n Guiraut don aug vera lauzor  
De Papion, e mezura e sen  
E pretz entier ab laus de tota gen.

## II.

Fis e leials, e senes tot enguan,  
Aissi com cel qu'a conquistat amors,  
Aurai en patz sufertas mas dolors,  
Qu'anc no m'anei planhen ni rancuran;  
Et ai amat longuamen dezamatz  
Vostre gen cors, dona, cui me soi datz;  
E pos merces ren ab vos no m valria,  
Partirai m'en ieu? non, qu'ieu non poiria.

Ans atendrai sufren e merceian  
Tro que de vos aia qualque secors,  
Qu'a tot lo meins m'er l'atendres honors,  
Bona dompna, si be m trac greu afan;  
Quar pro val mais ricx esperars onratz  
Q'uns aunitz dos de c'om no fos paguatz;  
Per qu'ieu serai tant amicx ses feunia,  
Tro que us apel, senes mentir, amia.

Bella dompna, foudat fas per semblan,  
Quar en chantan retrac vostras lauzors  
Ni la beutat don sobratz las gensors;  
Obs mi fora que us anes oblidan,  
Qu'ergueilhs vos creis e us merma humilitatz  
On plus vos vau membran vostras beutatz  
Ni la ricor qu'es aut sobre la mia;  
Dir n'ai doncx mal ieu? no, qu'ieu mentiria.

Mil vetz m'aurai acordat en pensan  
Cossi us pregues, pueis rete m'en paors,  
Quar oblidar mi fai vostras valors;  
Si com hom vai dius lo tertre camjan  
Que s'oblida so don plus es membratz,  
Ieu quan vos vei soi del tot oblidatz;  
Mas per so m'plai, quar faillimens seria,  
S'ieu pel deman lo bel solatz perdia.

Dompna, ben sai qu'a vostra valor gran  
M'aonda 'l cors, e sofranh m'en ricors;  
E si del plus li podetz far clamors,  
Vos et amors en siatz a mon dan;  
E si per so, dompna, m'ocaizonatz  
Quar no soi ricx, sera tortz e peccatz,  
Quar tan no val neguna mantentia  
Eudreit d'amor, com fis cors ses bauzia.

Pros comtessa, lo noms de Sobeiratz  
Es luenh auzitz per totz et enansatz,  
Per qu'ieu no m'part de vostra senhoria,  
Ni o farai aitan com vius estia.